

# KONSTITISION

**Républik Kontkolonial Larénion**

\*  
\* \*

\*  
\* \*

## **PATPORT**

**Lo Komité espésial lo Gran Lasanblé Kontkolonial la dékrèt lo promié lwa rénié lo 25 mars 2017 - Lwa-Dékrété 2017-GLK001/KE2503 - po dégrinn lo sistim kolonial é travay po Larénion dan tout son diversité kiltirèl é dan tout son dimansion sosial é ékonomik, po fénésans in léta rénié ek in Gran Konsey é in Gouvernman Kontkolonial.**

**Li la mazinn in Gran Konsey Kontkolonial, ek in pwindvizé, mèt an plas in konstitision po in léta rénié. In Léta y rovandik nout léritaz, sat y prann an kont listwar lèsklavaz ek la kolonizasion dopi 1663 ziska zordi.**

**Sa té konfirmé dann in Shart Kontkolonial lo 14 zilié 2017 - Lwa-Dékrété 2017-GLK/KE1407 - é par lo promié rénié espésial lo Gran Lasanblé Kontkolonial lo 5 novanm 2017.**

\*  
\* \*

## **SHAPIT I**

### **Républik Kontkolonial**

Lartik 1 :

Nout péi sé in Républik Kontkolonial.

Li lé lib, démokratik, popilèr é kontkapitalis.

Lartik 1-1 :

Nout sistinm politik lé kalé si in lékonomi planifié dan tout dominn, li va tourn ek bann Lantropriz nasional é bann Kopérativ.

Lartik 1-2 :

Tout bann rénioné dan son linité i koz in minm lang : kréol rénioné, sé nout lang nasional, sé la lang Léta rénioné..

Lartik 1-3 :

Nout bann kouler nasional sé : lo vèr, lo zonn, lo rouz.

Lartik 1-4 :

Lo bann koulèr nout drapo sé lo :

- Vèr, an souvnans lo maronaz dann tan lésklavaz, nout rézistans kont langazism é nout konba kont lo kolonialism.
- Zonn, pou tout sat la mèt la min, dopi domoun la ariv su la ter Larénion, la travay dir po mèt dobout nout péi.
- Rouz, sé tout la soufrans nout pèp la siporté, dan tan lésklavaz, langazism ék lo kolonialism.
- Le zétwal zonn, sé nout zétwal katrèr i mont a nou ousa nou sort é sirtou nout somin po domin.

Lartik 1-5 :

Nout limm nasional sé : In sèl pèp, in sèl nasion, anou minm rénioné.

Lartik 1-6 :

Nout fonnkèr nasional sé : Nout libèrté tanou, sa minm i donn anou la fors lèv dobout.

Lartik 1-7 :

Nout bann sinbol sé : 2 pwin levé ek in shinn kasé dann milié andsu in bato.

Lartik 1-8 :

Nout larzan nasional sé lo : katsou

Lartik 1-9 :

Nout fèt nasional sé lo 5 novanm, lo zour la révolt zèsklav Sinle.

## **SHAPIT II**

### **Téritwar, Ladministrasion**

Lartik 2 :

Nout péi sé Larénion - son lil ék son bann galé otour - é tout bann bout tèr nou konsidèr tanou, kom Sinpol ék Amsterdam, Krozé, Kerkélinn, zisko dernié bout la Ter Adéli.

Lartik 2-1 :

Nout mer otour nou, zisko bout sat i apèl la zonn ékonomik éskliziv (ZEE) tanou. Tanou osi tout lèspas andsu é andsou nout tèr èk nout mèr.

Lartik 3 :

Nout péi na ryink nou minm i pe désid koman aminn ali é fé respèk ali.

Lartik 3-1 :

Bann moun ék bann lantropriz deor na pwin lo drwa ashèt la ter, nout bann Lantropriz nasional ek nout bann Kopérativ.

Lartik 3-2 :

Bann moun èk bann lantropriz deor na pwin lo drwa trap riyn dan nout mer, na ryink la lwa i pe donn azot in lotorizasion éspésial posa.

Lartik 4 :

Sra lo Konsey Kominal ék lo Konsey Kartié nora la responsabilité sign bann konvansion ek lo bann kopérativ Léta rénioné.

## **SHAPIT III**

### **Nasionalité é obligasion**

Lartik 5 :

Toutsat i fé parti lo soubasman la fénésans nout pèp (kaf, yab, malbar, zarab, shinwa), lé rénioné, nou sé in sèl pèp in sèl nasion. Po lé zot la lwa va désid kosa é koman i fo fèr.

Lartik 5-1 :

In moun i perd son nasionalité rényoné si :

- li pran in not nasionalité,
- li okip in post dann in gouvèrnman péi deor,
- li lé zizé koupab de trayson kont nout péi
- li lé zizé konplis avèk in not péi, sinonsa in group la rod déstabiliz lintégrité nou péi.

Lartik 5-2 :

Tout bann sitwayin rényoné na lobligasion respèk la lwa :

- an promié respèk la Konstitisyon, lo drapo ek limm nasional
- aprés respèk la lwa Gouvèrnman ek son lotorité
- respèk la libèrté ek lo drwa domoun
- èd domoun lé dann malizé é an danzé
- fé an sort ke na lantant ant tout domoun
- respèk lanvironnman nout péi
- défann nout péi si na la gèr

Lartik 5-3 :

Domoun i respèk pa zot bann zobligasion sra pini par la lwa é va perd zot bann drwa.

## **SHAPIT IV**

### **Souvrinnté Nasional**

Lartik 6 :

La souvrinnté nasional lé dan la min lo pèp rényoné.

Lo pèp i ékzèrs dirèktoman son souvrinnté kan i fé :

- Zéléksion lo Shèf gouvèrnman Kontkolonial,
- Zéléksion lo bann Dépité lo Gran Lasanblé Kontkolonial,
- Zéléksion lo bann Mèr la Kominn,
- Zéléksion lo bann Shèf Kartié.

Lartik 7 :

Léta rényoné sé, lo Gran Lasanblé Kontkolonial, lo Gran Konsey Kontkolonial ek lo Gouvèrnman Kontkolonial.

Lartik 7-1 :

Nout bann promié zinstitision Léta rényoné sra la lwa va kal koman fé tourn ali :

- Lo Gran Lasanblé Kontkolonial i vot la lwa, nora bann Dépité andan, zot lé éli par

toutsat na la nasionalité rényoné . Aprésa zot va éli in Prézidan ek in Portparol ant zot.

Lartik 7-2 :

Si zamé lo Prézidan lo Gran Lasanblé Kontkolonial y gingn pi ou y ve pi prann son responsabilité, in nouvo Prézidan sra éli dan lé 30 zour. Lo konvokasion sra fé par lo Portparol lo Gran Lasanblé Kontkolonial. Sé lo Portparol lo Gran Lasanblé Kontkolonial va fé tourn lo Gran Lasanblé Kontkolonial ziska zéléksion. Sra parey po lo Portparol lo Gran Lasanblé Kontkolonial.

Lartik 7-2-a :

Si zamé i gingn pu fé vot lo bann lwa dovan lo Gran Lasanblé Kontkolonial é ke lo bann Dépité i fé in vot blokaz, lo Gouvernman Kontkolonial i disoud lo Gran Lasanblé Kontkolonial é i konvok in not zéléksion Dépité dan lé 90 zour.

Larti 7-2-b :

Si aprésa - apré lo vot - na touzour in blokaz, lo Gouvernman Kontkolonial va konvok in not zéléksion Shèf Gouvernman dan lé 90 zour.

Lartik 7-2-c :

Si zamé in dépité i pèrd son bann drwa, i désot la vi, sinonsa i démisionn, i prann lo proshin i rès su la lis li lété po ranplas ali.

Lartik 7-2-d :

Si zamé na pi moun po ranplas ali, i lès komsa minm, tank la mazorité bann Dépité lé ankor la. Kan la pi la mazorité Gouvernman Kontkolonial va rokonvov in zéléksion zénéral.

- Lo Gran Konsey Kontkolonial i vèy dosi lo Konstitision é va fé tout po fé respèk la lwa partou, nora bann Gran Konséyé andan, li nora in Prézidan ék in Portparol sra éli anparmi lo bann Gran Konséyé.

Lartik 7-3 :

Si zamé lo Prézidan lo Gran Konsey Kontkolonial y gingn pi ou y ve pi prann son responsabilité, in nouvo Prézidan sra éli dan lé 30 zour. Lo konvokasion sra fé par lo Portparol lo Gran Konsey Kontkolonial. Sé lo Portparol lo Gran Konsey Kontkolonial va fé tourn lo Gran Konsey Kontkolonial ziska zéléksion. Sra parey po lo Portparol lo Gran Konsey Kontkolonial.

Lartik 7-3-a :

Si zamé na in manm lo Gran Konsey Kontkolonial y gingn pi ou y ve pi prann son responsabilité, li sar ranplasé par lo linstitision la mèt ali an plass.

Lartik 7-3-b :

Si in manm lo Gran Konsey Kontkolonial y respèkt pi la lwa, y mèt ali déor é li sar

ranplasé.

Lartik 7-3-c :

Na riyink lo Gouvernman Kontkolonial i pe fé in propozision po shanz lo Konstitision.

Lartik 7-3-d :

Po shanz lo Konstitision, i fo lakor, lo Gran Lasanblé Kontkolonial ek lo Gran Konsey Kontkolonial.

Lartik 7-3-e :

Si i trouv pa in lakor, lo Gouvernman Kontkolonial i konvok in zéléksion dan lé 90 zour po fé valid la modifikasion lo Konstitision par lo pèp. Toutsat na la nasionalité rényoné i pouva voté zour la.

▪ Lo Gouvernman Kontkolonial i diriz lo péi é i propoz la lwa, li nora in Shèf Gouvernman. li nora la responsabilité ladministrasion kontkolonial, sé li nora lo responsabilité protèz nout pèp, nout péi é nout bann zinstitision nou la mèt an plas kan y fo é kom y fo. Sé li va roprézant nout péi an déor.

Lartik 7-4 :

Si zamé lo Shèf lo Gouvernman Kontkolonial y gingn pi ou y ve pi prann son responsabilité, in nouvo Shèf sra éli dan lé 90 zour. Lo konvokasion sra fé par lo Portparol lo Gouvernman Kontkolonial. Sé lo Portparol lo Gouvernman Kontkolonial va fé tourn lo Gouvernman ziska zéléksion.

Lartik 7-4-a :

Si zamé na in manm lo Gouvernman Kontkolonial y gingn pi ou y ve pi prann son responsabilité, lo Shèf lo Gouvernman Kontkolonial y ranplas ali.

Lartik 7-4-b :

Si in manm lo Gouvernman Kontkolonial y respèkt pi la lwa, lo Shèf lo Gouvernman Kontkolonial y ranplas ali.

Lartik 7-5 :

Sé lo Gouvernman Kontkolonial i désid kan i fé lo zéléksion Dépité po mèt dobout lo Gran Lasanblé Kontkolonial é la lwa va désid koman va spasé é konbyin dépité i fodra.

Lartik 7-6 :

Sé lo Gran Lasanblé Kontkolonial po in moitié ék lo Gouvernman Kontkolonial po lot moitié va désid kisa i rant andan lo Gran Konsey Kontkolonial.

Lartik 7-7 :

Na riyink in moun lé andan lo Gran Konsey Kontkolonial i pe èt kandida po èt lo Shèf

lo Gouvernman Kontkolonial, toutsat na la nasionalité réioné i pe voté zour la. Sé lo Gouvernman Kontkolonial i désid kan i fé lo zélèksion.

Lartik 7-8 :

Lo Shèf Gouvernman Kontkolonial i di kisa i rant andan lo Gouvernman é koman va spasé.

Lartik 7-9 :

Léta réioné na pwin Prézidan, sé lo Shèf lo Gouvernman Kontkolonial i anminn laksion politik nout péi. Li lé konsidéré kom in Shèf Léta.

Lartik 7-10 :

Tout bann moun lé responsab Léta réioné (lé éli ou nomé) lé révokab ninport kel moman. Posa i fo na in rézon podvré. Na riynk lo Gran Konsey Kontkolonial, i pe désid son révokasion.

Lartik 7-11 :

Lo Gouvernman Kontkolonial i dépoz son bann prozé lwa dovan lo Gran Konsey Kontkolonial po vérifié si lo bann tèks i respèk lo Konstitision avann dépoz ali dovan lo Gran Lasanblé Kontkolonial po validé.

## **SHAPIT V** **Rézion, Koléktivité**

Lartik 8 :

Nout péi lé konpozé :

- Lil Larénion
- Lil Sinpol
- Lil Amsterdam
- Lil Krozé
- Lil Kerkelinn
- Ter Adéli

Lo bann zil lé divizé an rézion :

- Lo Nor
- Lo Sid
- Lwès
- Lès

Lo bann Rézion lé divizé an Kominn

Lo bann Kominn an Kartié.



Lartik 8-1 :

Sé la lwa va désid konbiyn kominn ék kartié nora dan nout péi, va di ousa son bor i komans é ousa i fini é lo responsabilité shakinn nora. Sé la lwa i kal koman i fé tourn ali.

Lartik 8-2 :

Na ryink bann kominn ék bann kartié nora in pouvoir politik lokal. Lo bann kominn nora in Konsey Kominal, ryink lo bann moun la kominn nora lo drwa vot po lo Mèr. Le bann Kartié nora in Konsey Kartié, ryink lo bann moun lo kartié nora lo drwa vot pou lo Shèf Kartié.

Lartik 8-3 :

Sé lo Mèr va di kisa i lé lo bann konséyé kominal. La lwa va di konbiyn nora.

Lartik 8-4 :

Sé lo Shèf Kartié va di kisa i lé lo bann konséyé kartié. La lwa va di konbiyn nora.

Lartik 8-5 :

Sé lo Gouvernman Kontkolonial i désid kan é koman i fé lo bann zélèksion.

Lartik 8-6 :

In moun kondané po in fot grav na pi lo drwa voté, prézant ali po in zélèksion é travay dann ladministrasion kontkolonial, sinonsa dan in Lantropriz nasional. Si li lé déza in moun lé andan ladministrasion kontkolonial, sinonsa dan in Lantropriz nasional, li va perd son plass toutswit.

Lartik 8-6-a :

Voté lé obligatwar, 16 zan apartir.

Lartik 8-6-b :

Laz po tiynbo in manda i komans 18 tan apartir.

## **SHAPIT VI**

### **Bitasion, Lékonomi, Komèrs**

Lartik 9 :

La ter lé o pèp réniyé, Léta réniyé i vey andsu, na riynk li i pe désid koman anservir.

Parey po lo bordmèr, la foré, bann sours, dolo soulater, la ravinn, létan, bann karyèr.

Lartik 9-1-a :

Tout bann réniyé na lo drwa anserv in bout la tèr Larénion pou li konstrwi son kaz

pou li viv, pou li planté, po li manzé, po sony son zanimo.

Lartik 9-1-b :

Latèr bitasion na pwin lo drwa fé la kaz andsu.

Lartik 9-1-c :

La lwa i di koman anserv la tèr é kosa i fé si domoun i respèk pa li.

Lartik 9-2 :

Domoun i anserv la tèr néna osi bann zobligasion. Li pe pa itiliz son bout la tèr ninport koman é sirtou kont lintéré zénéral.

Lartik 9-2-a :

Na pwin lo drwa ansèrv bann prodwi shimik dan tout bitasion (sof in lakor espésial lo Gouvernman Kontkolonial si vréman i fo) parkont tout sra fé po mèt anplas bann plantaz konm dann vyé tan.

Lartik 9-2-b :

Po fé aminn dan nout péi tout kalité zanimo i sort andeor i fo in lakor espésial lo Gouvernman Kontkolonial.

Lartik 9-2-c :

Andan nout bann foré andémik na pwin lo drwa trap zafèr, sof in lotorizasion espésial lo Gouvernman Kontkolonial.

Lartik 9-3 :

La lwa i réglomant koman va fé po èksplwat lo bann rishès nout péi pou mèt an valer son bann resours natirèl.

Lartik 9-4 :

Sra bann Lantropriz nasional ek bann kopérativ Léta rénioné va organiz nout lékonomi, dan tout bann dominn.

Lartik 9-5 :

Sé lo Shèf Gouvernman va désid kisa i diriz lo bann Lantropriz nasional ek lo bann Kopérativ. Lo Gouvernman Kontkolonial na la responsabilité mazinn in plan po fé tourn nout lékonomi.

Lartik 9-6 :

Sé lo Prézidan Lantropriz nasional ek lo Shèf Kopérativ na la responsabilité fé tourn ali é fé respèk lo bann dézision é pwindvizé lo Gouvernman.

Lartik 9-6-a :

Andan lo bann Lantropriz nasional va artrouv riyenk bann moun Gouvernman Kontkolonial va mèt an plas.

Lartik 9-6-b :

Andan lo bann kopérativ va artrouv lo roprézantan lo Gouvernman Kontkolonial sra lo Shèf Kopérativ, lo bann roprézantan bann Konsej Kominal, bann Konsej Kartié ek lo bann travayèr lantropriz.

## **SHAPIT VII**

### **Lidantité, Kiltir, Patrimwann**

Lartik 10 :

Nout lidantité kiltirèl lé rokoni dan tout son diversité.

Lartik 10-1 :

Tout nout bann patrimwann té dann fénwar nou mèt ali anlèr.

Lartik 10-2 :

Sra fé in gran farfar (pèpléman Larénion kiswa dan léo sinonsa dan lé ba) po souvnans bann maron, bann domoun la sobat povréman po nout péi, nou nora in rokonésans po zot.

Lartik 10-2-a :

Bann lantant, bann mizé, bann liv, bann dokiman, bann lartik zournal, bann lémission radio ek télé, bann kozman su linternèt i mèt anlèr lo sistinm kolonial lé interdi.

## **SHAPIT VIII**

### **Radio, Télévision**

Lartik 11 :

Lo Gouvernman Kontkolonial i mèt an plas in Lantropriz nasional po mèt dobout son Radio ek son Télévizion. Va fé parey po lo téléfonn ek internèt. La lwa va désid koman va organiz tousa.

Lart 11-1 :

Bann Lantant domoun va fé parey dan bann Kartié.

Lartik 11-2 :

Léta réniomé i protèz lo drwa domoun i anserv téléfonn ek Internèt.

Lartik 11-3 :

Léta réniyé na son Zournal Ofisièl po fé konèt tout bann tèks lwa dékreté é voté é tout bann zinformasion ki fo fé konèt su son ladministrasion.

Lartik 11-4 :

Lo Gouvernman Kontkolonial i mèt an plas in Lantropriz nasional po mèt dobout son Zournal Nasional po fé konèt tout bann zinformasion domoun.

Lartik 11-4-a :

Bann Lantant domoun va fé parey dan bann kominn é dann bann kartié. La lwa va désid koman va organiz tousa.

## **SHAPIT IX**

### **Santé, Travay, Lédikasion, Famy**

Lartik 12 :

Léta na lobligation garantir lo drwa viv é èt an bonn santé, lo drwa in travay ek in kaz.

Lartik 12-1 :

Léta na la responsabilité fé tout sakifo po mèt an plas bann striktir po fé spor é organiz lo bann moun i ve.

Lartik 12-2 :

Doktèr, linfirmié, médikaman, lopital, toutsat la bozwin po la santé domoun nora pa bozwin péyé.

Lartik 12-3 :

La lwa va dir kélaz in moun i pe gingn komans travay.

Lartik 12-4 :

Tout bann sitwayin na lo dovwar ek lo drwa travayé é sirtou fé lo travay li ve pou li viv é fé viv son fami par rapor son konpétans.

Lartik 12-5 :

Tout bann moun i travay po Léta réniyé, sinonsa dan bann lantropriz nasional, dan bann Kopérativ ek dan bann Lantant, na lo drwa gingn in salèr korèk, gingn ropoz azot é alé an konzé kan i fo.

Lartik 12-6 :

Léta réniyé i garanti po bann travayèr, légalite lo bann kondision travay ek lo salèr

pe in port kisa lilé, koman lilé, pe in port son bann krwayans ek son bann zopinion.

Lartik 12-7 :

Tout bann travayèr i pe rant dann in sindika po défann son lintéré ousa li travay. Shak travayèr ke lé dann sindika ou pa, na lo drwa fé la grèv.

Lartik 12-7-a :

Bann sindika lé organisé an Lantant.

Lartik 12-8 :

Léta rényoné i garanti in kaz po tout domoun, dolo, lèktrisité, téléfonn ek internèt. Zinpo i ekzis pa dan nout péi.

Lartik 12-9 :

Tout moun lé dann malizé, kiswa andikapé, vié moun, marmay fay, sra protézé par Léta rényoné.

Lartik 12-9-a :

Kan domoun i travay pi, léta i garanti ali in rotrèt parey sat lu té gingn kan lu té travay.

Lartik 12-9-b :

Kan in moun i désot la vi, son dinité lé garanti par la lwa dan lo respé son bann krwayanz.

Lartik 12-9-c :

Léta rényoné va mèt anplas in lantant po mèt ansanm domoun té viktim lo sistim kolonialis.

Lartik 12-10 :

Nout listwar, nout lanvironnman, toutsat i konsèrn anou sra amontré an promié dan bann lékol.

Lartik 12-10-a :

Lékol lé obligatwar 3 zan apartir ziska laz 16 zan.

Lartik 12-11 :

Domoun lé oblizé donn son san kan na in gran katastrof sof si lo moun lé malad ou lé fay. In moun i pé donn son san 16 zan apartir ziska 65 kan posa fo zot lé an bonn santé

## **SHAPIT X**

### **Sékirité, Zistis, Larmé**

Lartik 13 :

Po défann é protèz nout péi na in Larmé Nasional Kontkolonial ek lo bann Servis Sékirité Kontkolonial sakifo. Lo Gouvernman na lo responsabilité mèt tousa an plas. La lwa va esplik tout kom i fo.

Lartik 13-1 :

Po fé prann konsians shakinn linportans protèz nout péi é gingn la kapasité po protèz ali, tout moun va pass in nan dann larmé, dann bann servis sékirité, sinonsa dann ladministrasion kontkolonial.

Lartik 13-1-a :

Aprésa si na désertin i ve rèss dann larmé, sinonsa dann bann servis sékirité, la lwa va kal sa kom i fo.

Lartik 13-2 :

Po défann é protèz lo drwa tout rénioné é sat nout péi, na in Tribinal Kontkolonial ek in konpétans su sat la spass yèr é sirtou su sat i spass zordi, minm po sat la spass an deor nout péi. Lo Gran Konsey na lo responsabilité mèt ali an plas. La lwa i kal sa kom i fo.

Lartik 13-2-a :

Lo Prézidan lo Gran Konsey Kontkolonial lé lo Prézidan lo Tribinal Kontkolonial. Ali minm i désid kisa i rant andan.

Lartik 13-3 :

Lo Shèf Gouvernman Kontkolonial na lo responsabilité dékrèt la lwa espésial, si nout péi lé an danzé podvré. Lo Gouvernman va fonksionn konm in Gouvernman Espésial, li sra lo sèl linstitision Léta rénioné i poua désid tout.

Lartik 13-3-a :

La lwa espésial lé valab in nan, aprésa sé lo Gran Konsey Kontkolonial ek lo Gran Lasanblé Kontkolonial va di si lo Gouvernman Kontkolonial i pe kontinié tourn komsa, si i fo va rodonn ali in lotorizasion espésial po in nan.

Lartik 13-3-b :

Lo Shèf Gouvernman Kontkolonial va mèt an plas in Tribinal Espésial Kontkolonial (TEK).

Lartik 13-3-c :

Lo Shèf Gouvernman Kontkolonial va mèt an plas in Ladministrasion Espésial Kontkolonial (LEK).

Lartik 13-3-d :

Lo Shèf Gouvernman Kontkolonial va mèt an plas tout lo bann lwa ek lo bann teks espésial i fo.

## **SHAPIT XI**

### **Transpor, Déplasman, Lénerzi**

Lartik 14 :

Lo Gouvernman Kontkolonial na la responsabilité organiz lo bann déplasman (loto, moto, kar, trin, bato ek lavion) partou dan nout péi, dan la mer é an lèr.

Lartik 14-1 :

Li na la responsabilité bann gran shomin. Désertin sra sou la responsabilité la Kominn, sinonsa lo Kartié.

Lartik 14-2 :

Lo Gouvernman Kontkolonial i dwa fé toutsat li pe po protèz nout lanvironnman, kan i fabrik kouran, i fé tourn lizinn, i fé roul loto. Toutsat nou anserv kom lénerzi i fo i respèk nout lanvironnman.

## **SHAPIT XII**

### **Rolasion diplomatik**

Lartik 15 :

Lo Gouvernman Kontkolonial na la responsabilité sign bann trété é désid rant andan bann lorganizasion intèrnasional.

Lartik 15-1 :

I fo lakor lo Gran Lasanblé Kontkolonial ek lo Gran Konsey Kontkolonial po valid ali podvré.

Lartik 15-2 :

Sra lo Gouvernman Kontkolonial va désid ek kèl Gouvernman bann péi deor li pe travay é kèl roprézantan li pe anvoyé dan shakinn.